

ԻԲ. ՆԱԽԱԶԳՈՒՇՈՒԹԻՒՆ

Երբ զարթեցայ, գիշեր էր: Որքա՛ն ժամանակ անցել էր օրից, քանի՞ ժամ քնել էի, ես չկարողացայ գիտենալ: Փափուկ եւ տաք գիշեր էր: Որքա՛ն գեղեցիկ վառուում էր ամառային երկինքը իր փայլուն գոհարներով. որքա՛ն մեղմ եւ մտախոհ կերպով սահում էր կիսալուսինը պարզ եթերքի միջով:

Ես պառկած էի դալար խոտերի վրայ, եւ խիստ ախորժ ծուլութեամբ թաւալում էի մի կողքից դեպի միւսը: Ականջ էի դնում: Ամեն տեղ տիրում էր խորին լռութիւն, բոլորը՝ հանգստանում էին: Արթուն էր միայն վտակը, որի ափի մօտ պառկած էի. ես լսում էի նրա խուլ-մելամաղձական խոխոջմունքը, նա անդադար վազում էր եւ վազում, նա քուն եւ հանգստութիւն չունէր: Ահա, հովասուն գեփիւմը փափուկ թելքը քսեց իմ երեսին եւ շոացնելով անցաւ. կարծես, ուզում էր ասել՝ «տե՛ս, ես էլ արթուն եմ»:

Աչքս դարձրի դեպի աստղազարդ երկինքը: Նայում եմ: Այո՛, դեղեցի՛կ են աստուծոյ լուսաւորները: Որո՞նում եմ նրանց մէջ իմ աստղը, երկա՛ր որոնում եմ, բայց չեմ գտնում: Ահա՛ երկու աստղեր. նրանք ծանօթ են ինձ, ես շատ անգամ տեսել եմ նրանց, համբուրել եմ... շատ անգամ նրանք նայել են ինձ վրայ ջերմ քնքշութեամբ...: Ես ճանաչում եմ ձեզ, սիրուն աստղեր, դուք նմանում էք Սոնայի տխուր եւ արտաստայի աչքերին, որպէս այն վերջին գիշերը, երբ նա բաց արաւ իմ բանտի դուռը եւ ասաց՝ «փախիր, Ֆարհատ»: Ահա երկու աստղեր եւս, ինչպէս հպարտ եւ ինքնահաւան կերպով փայլում են նրանք. նմանում են նրանք Մարօի լի կրակով աչքերին, երբ նա հրացանը ձեռքին կանգնած, ժպտում էր այն սարսափելի թռպետում, երբ ես շաղախոած էի դաբանի արիւնով:

Սիրո՛ւմ եմ ձեզ, գեղեցիկ աստղեր: Ահա՛ անցաւ մի սեւ ամպ եւ ծածկեց իմ տեսութիւնից նազելի աչիկները...

– Ա՛խ, Սօնա... ա՛խ, Մարօ...

– Ի՞նչ է, – լսելի եղաւ մի ձայն եւ իմ առջեւ նկատուեցաւ մի պատկեր, որպէս կերպարանքը գիշերային ուրուականի:

Մի սարսուռ վազեց բոլոր մարմնիս մէջ:

– Ես եմ, Ֆարհատ.

– Ա՛խ, Մարօ...

Երեւակայեցէք իմ ուրախութիւնը, ուրախութիւնը լի վառոած կրթերով մի պատանիի, որ գիշերային լռութեան մէջ, հեռու մարդկային բնակութիւնից, գտնում է նրան, որին սիրում է: